

Savaatillit nersutaatillillu inuussutissarsiuteqarnerannut nanoqartalenera qanoq annertutigisumik ajornartorsiutaalersimanagera, tamatumani qanoq iliuseqarfigineqarsinnaanera pillugu Naalakkersuisut misissuisitsissasut Inatsisartut aalajangiiffigisassaattut siunnersuut.

Inatsisartunut ilaasorta q Aqqaluaq B. Egede, Inuit Ataqtigiit

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aappassaaneerneqarnera

Naalakkersuisut sinnerlugit Aalisarnermut, Piniarnermut Nunalerinermullu Ataatsimiititaliap siunnersuummut tunngatillugu suliaannut qutsaviginiarpakka. Naalakkersuisut maluginiarpaat ataatsimiititaliaq isumaqatigiilluni siunnersuutip akuerineqarnissaa innersuutigigaa siullermeerneqarnerani akissuteqaatip suliarineqarnera tunngavigalugu aammalu siunnersuummut annertunerusumik oqaaseqaateqarnissaminut ataatsimiititaliaq pissutissaqarnerani.

Ataatsimiititaliap nannut pillugit aalajangersakkat iluarsaanneqarnissaasa ilimasaarutigineqartup qaqugu naammassineqartussatut naatsorsuutigineqarnera siunnersuutip aappassaaneerneqarnissaanut akissuteqaammi takuneqarsinnaassasoq ataatsimiititaliamit qinnutigineqarpoq.

Tassunga tunngatillugu nalunaarutigissavara Naalakkersuisoqarfiup nalunaarutip nutarterneqarnissaa ukiumi nutaami aallartissammagu aammalu naatsorsuutigalugu 2016-ip affaata siulliani tamanut tusarniutaanissaa, taamaasilluni aalajangersakkat ukiumi piniarfiusumi 2017-imi atuutilersinneqarniassammata. Piniakkanik killilersukkanik eqqartuisoqartillugu, aalajangersakkat nutaat ukioq piniarfik nutaaq aallartikkaangat atuutilersinneqarnissai naleqqunnerpaasarpoq. Nannunik naammattoorsinermi periusissatut ilitsersuutit pisariaqartitsineq malillugu nutarsarneqarsinnaapput.

Taamatut oqaaseqarlunga Inatsisartut aalajangiiffigisassaattut siunnersuut Inatsisartuni oqaluuserineqartussanngortippara.